

Debate d'a Comunidá: No ye o mesmo pedricar que dar de minchar

Por enesima begata, podemos constatar que prometer ye barato.

Dende que o Presidén autual d'Aragón se posó, ya fa más de 10 añadas, en a siede d'o Gubierno, prometió por autiba e por pasiba que a normalización d'as luengas d'Aragón iba á estar una d'as suyas prioridaz.

O suyo conzeuto de prioridá ye, cuan menos, muito orichinal. Resulta que o pasato 17 de setiembre en o clamato *Debate d'a Comunidá* esgranó una zincuante de midas prioritarias. Pos bien, denguna d'as zincuante encluyiba a normalización de l'aragonés, por o que cal deduzir que ista añada, igual como as diez anteriors, ta o Gubierno d'Aragón no ye una prioridá *prioritaria* una lai que empare e protexa os dreitos d'os fabladors d'aragonés. Ta plorar!